

# THE DĀTHĀVAMSA.

---

NAMO TASSA BHAGAVATO ARAHATO SAMMASĀMBUDDHASSA.

---

## PAṬHAMO PARICCHEDO.

- 1 Visāradam vādapathātivattinam  
tilokapajjotam asayhasāhinam  
asesañeyyāvaraṇappahāyinam  
namāmi satthāram anantagocaram
- 2 Tilokanāthappabhavam bhayāpaham  
visuddhavijjācaraṇehi sevitam  
papañcasaññojanabandhanacchidam  
namāmi dhammam nipuṇam sududdasam
- 3 Pasādam attena pi yattha paṇino  
phusanti dukkhakkhayam accutam padam  
tam āhuneyyam susamābitindriyam  
namāmi saṅgham munirājasāvakam
- 4 Vibhūsayam Kālakanāgaranvayam  
Parakkamo kārūṇiko camūpati  
gavesamāno jinasāsanassa yo  
virūlhim atthañ ca janassa patthayam
- 5 Sudhāmayūkhāmalapaṇḍuvamsajam  
virūlhasaddham munirājasāsane  
piyamvadam nītipathānuvattinam  
sadā pajānam janikam va mātaram

- 6 Piyam parakkantibhujassa rājino  
mahesim accunnatabuddhisampadam  
vidhāya Līlāvatim icchitatthadam  
asesalaṅkātalarañjalakkhiyam
- 7 Kumāram ārādhita-sādhumantinaṃ  
mahādayaṃ Paṇḍunarindavamsajaṃ  
vidhāya saddhaṃ Madhurindanāmakam  
susikkhitam pāvācane kalāsu ca
- 8 Narindasuññaṃ suciran ti-Sihalaṃ  
itippatītaṃ ayasaṃ apānudi  
ciraṃ paṇītena ca cīvarādīnā  
susaññate saṃyamino atappayi
- 9 Ciraṭṭhitim pāvācanassa icchatā  
kataññunā vikkamabuddhisālīnā  
satīmatā candimabandhukittinā  
sagāravaṃ ten' abhiyācito ahaṃ
- 10 Sadesabhāsāya kavīhi Sīhale  
katam pi vamsaṃ jinadantadhātuyā  
niruttiyā Māgadhikāya vuddhiyā  
karomi dīpantaravāsinaṃ api
- 11 Jino yam iddhe Amaravhaye pure  
kadāci hutvāna Sumedhanāmako  
savadavedaṅgavibhāgakovido  
mahaddhane vippakulamhi mānava
- 12 Ahaṃ hi jātivyasanena pīlito  
jarābhībhūto maraṇena otthaṭo  
sivaṃ padaṃ jātijarādinissaṭaṃ  
gavessayissaṃ ti raho vicintiya
- 13 Anekasaṅkhaṃ dhanadhaññasampadam  
patitṭhapetvā kapaṇesu duccajaṃ  
anappake pemabharānubandhino  
vihāya mitte ca sute ca bandhave
- 14 Pahāya kāme nikhile manorame  
gharābhinikkhamma Himācalantike  
mahidharaṃ Dhammikanāmaṇissutaṃ  
upecca nānātarurājibhūsitam
- 15 Manonukūle surarājanimmite  
asammigānaṃ agatimhi assame

- nivatthacīro ajinakkhipaṃ vahaṃ  
 jaṭādharo tāpasavesam aggahi  
 16 Susaṇṇatatto parimāritindriyo <sup>1</sup>  
 phalāphalādihi pavattayaṃ tanuṃ  
 gato abhiññāsu ca pāraṃ vasi  
 taṃ samāpattisukhaṃ avindi so  
 17 Susajjite Rammaṇpurādhivāsina  
 mahājanen' attamanena añjase  
 pathappadesa abhiyantaṃ attano  
 anitṭhite yeva Sumedhatāpaso  
 18 Agādhañeyyodadhipāradassinā  
 bhavantaṃ nibbanaṃ <sup>2</sup> vināyakaṃ  
 anekakhiṇāsavalakhaṇaṃ  
 kadāci Dīpaṇkarabuddhaṃ addasa  
 19 Tato sasaṅghassa tilokabhaddo  
 pariccajivāna tanuṃ pi jīvitaṃ  
 pasārayivāna jaṭājinādikā  
 vidhāya setuṃ tanuṃ eva pallale  
 20 Anakkamitvā kalalaṃ mahādayo  
 sabhikkhuko gacchatu piṭṭhiyā iti  
 adhiṭṭhahitvāna nipannaṃ taṃ  
 anāthaṃ etaṃ ti-bhavaṃ samekhiya  
 21 Dayāya saṇcōditamānaso jāne  
 bhavaṇṇavā uddharitaṃ dukkhaddite  
 akāsi sambodhipadassa pattiya  
 mahābhinihāraṃ udaggavikkama  
 22 Atho viditvā vasinaṃ tam āsayaṃ  
 adāsi so vyākaraṇaṃ mahāmuni  
 tato purāṃ taṃhi Tathāgate gate  
 sayāṃ vasi sammāsi pāramiṇe  
 23 Tato ca kappānaṃ alinaṃ vikkama  
 asaṅkhiye so cattaro salakkhake  
 taṃ taṃ jātisu bodhipācane  
 visuddhasambhāraṇe apūrayi  
 24 Athābhijāto Tusita mahāyaso  
 visuddhasambodhipadopaladdhiyā

<sup>1</sup> M. parivārīta.<sup>2</sup> B. nibbanaṃ.

- udikkhamāno samayaṃ dayādhano  
 ciraṃ vibhūtiṃ anubhosi sabbaso  
 25 Sahassasaṅkhādasacakkavāḷato  
 samāgatānekasurādhipādihi  
 udaggudaggehi jinantapattiyā  
 sagāraṃ so abhigamma yācito  
 26 Tato cavitvā Kapilavhaye pure  
 sadā sato Sakyakulekaketuno  
 ahosi Suddhodanabhūmibhattuno  
 Mahādimāyāya mahesiyā suto  
 27 Vijātamatto 'va vasundharāya so  
 paṭiṭṭhahitvāna disā vilokayi  
 tadā ahesuṃ vivaṭaṅganā disā  
 apūjayuṃ tattha ca devamānusa  
 28 Adbārayuṃ ātapavāraṇādikam  
 adissamānā va nabhamhi devatā  
 padāni so satta ca uttarāmukho  
 upecca nicchārayi vācam āsabbhiṃ  
 29 Yathattha-Siddhatthakumāranāmako  
 mahabbalo yobbanahāriviggaho  
 ututtayānucchavikesu tīsu so  
 'nubhosi pāsādavaresu sampadam  
 30 Kadāci uyyānapathe jarāhataṃ  
 tathāturaṃ kālakatam ca saṃyamim  
 kamena disvāna virattamānaso  
 bhavesu so pabbajituṃ akāmayi  
 31 Sapupphadipādikarehi rattiyam  
 purakkhato so tidivādhivāsihi  
 sa-Channako Kanthakavājjīyānato  
 tato mahākaruṇiko ' bhinikkhami  
 32 Kamena patvāna Anomam āpagam  
 sudhotamuttāphalahārisekate  
 paṭiṭṭhahitvā varamoḷibandhanam  
 sitāsīlūnam gagane samukkhipi  
 33 Paṭiggahetvā tidasānam issaro  
 suvaṇṇacaṅgotavarena tam tadā  
 tiyojanam nīlamanīhi cetiyam  
 akāsi cūḷāmaṇim attano pure

- 34 Tato Ghaṭikārasarojayoninā  
 samāhaṭaṃ dhārayi cīvarādikaṃ  
 atho sakāṃ vatthayugaṃ nabhatthale  
 pasatthavesaggahaṇo samukkkhipi
- 35 Paṭiggahetvāna taṃ ambujāsano  
 mahiddhiko bhattibharena codito  
 sake bhava dvādasayojanaṃ akā  
 maṇiḥi nīlādihi dussacetiyaṃ
- 36 Susaṇṇatatto satimā jitindriyo  
 vinītaveso rasagedhavaṃjito  
 cha hāyanān' eva anomavikkamo  
 mahāpadhānaṃ padahittha dukkaraṃ
- 37 Visākhamaṣass' atha puṇṇamāsiyaṃ  
 upecca mūlaṃ sahaṃjāya bodhiyā  
 tiṇāsane cuddasahatthasammite  
 adhiṭṭhahitvā viriyaṃ nisajji <sup>1</sup> so
- 38 Avattharantiṃ vasudhaṃ ca ambaraṃ  
 virūpavesaggahaṇena bhimsanaṃ  
 pakampayanto sadharādharaṃ mahiṃ  
 jino padose jini māravāhiṇiṃ
- 39 Surāsurabrahmagāṇehi sajjite  
 jagattaye pupphamayagghikādīnā  
 pavattamāne suradundubhissare  
 abujji bodhiṃ rajanīparikkhaye
- 40 Tadā pakampiṃsu saselaṇānā  
 sahasasāṅkhādasalokadhātuyo  
 agaṇchi so loṇapayodhi sādutaṃ <sup>2</sup>  
 mahāvabhāso bhuvanesu patthari
- 41 Labhiṃsu andhā vimale vilocane  
 suṇiṃsu sadde badhirā pi jātiyā  
 lapiṃsu mūgā vacanena vaggunā  
 carīṃsu khelaṃ padaṣā 'va paṅgulā
- 42 Bhaviṃsu khujjā ujusommaviggahā  
 sikhī 'pi nibbāyi avīci-ādisu  
 apāgamuṃ bandhanato pi jantavo  
 khudādikaṃ petabhavā apakkami

<sup>1</sup> B. nisajja.<sup>2</sup> sādhuṭaṃ.

- 43 Samiṃsu rogavyasanāni pāṇinaṃ  
bhayaṃ tiracchānagate na piḷayi  
janā ahesuṃ sakhilā piyaṃvadā  
pavattayum koṇcanadaṃ mataṅgajā
- 44 Hayā ca hesiṃsu pahaṭṭhamānasā  
nadiṃsu sabbā sayam eva dundubhī  
raviṃsu dehābharanāni pāṇinaṃ  
disā pasīdiṃsu samā samantato
- 45 Pavāyi mando sukhasītamāruto  
pavassi meggho pi akālasambhavo  
jahiṃsu ākāśagatiṃ vihaṅgamā  
mahim samubbhijja jalaṃ samuṭṭhahi
- 46 Asandamānā 'va ṭhitā savantiyo  
nabhe virocimsu asesajotiyo  
bhavā ahesuṃ vivaṭā samantato  
janassa nāsuṃ cavanupapattiyo
- 47 Samekkhataṃ nāvaraṇā nagādayo  
pavāyi gandho api dibbasammato  
dumā ahesuṃ phalapupphadhārino  
ahosi channo kamalehi aṇṇavo
- 48 Thalesu toysu ca pupphamānakā  
vicittapupphā vikasiṃsu sabbathā  
nirantaraṃ pupphasugandhavuṭṭhiyā  
ahosi sabbam vasudhambarantaram
- 49 Nisajja pallaṅkavare tahiṃ jino  
sukhaṃ samāpattivihārasambhavaṃ  
tato 'nubhonto sucirābhipatthitaṃ  
dināni satt' eva atikkamāpayi
- 50 Samuppatitvā gagananāgaṇaṃ tato  
padassayitvā yamakaṃ mahāmuni  
sa pātihiṃsa tidivādhivāsinaṃ  
jinattane saṃsayitaṃ nirākari
- 51 Ath' otarivāna jayāsanassa so  
ṭhito va pubbuttarakaṇṇanissito  
dināni sattānimisena cakkhunā  
tam āsanaṃ bodhitaruṃ ca pūjayi
- 52 Ath' antarāle maṇicaṅkame jino  
ṭhitappadesassa ca āsanassa ca

- mahārahe devavarābhinimmitte  
 dināni satt' eva akāsi caṅkamam  
 53 Tato disāyaṃ aparāya bodhiyā  
 upāvisitvā ratanālaye jino  
 samantapaṭṭhānanayaṃ vicintayaṃ  
 dināni satt' eva sa vītināmayi  
 54 Viniggato satthu sarīrato tadā  
 jutippabandho paṭibandhavajjito  
 pamāṇasuññāsu ca lokadhātusu  
 samantato uddham adho ca patthari  
 55 Vaṭassa mūle Ajapālasaṇṇino  
 sukhaṃ phusanto pavivekasambhavaṃ  
 vināyako satta vihāsi vāsare  
 anantadassī surarājapūjito  
 56 Vihāsi mūle Mucalindasākhino  
 nisajja bhogāvalimandirodare  
 vikiṇṇapupphe Mucalindabhogino  
 samādhinā vāsarasattakaṃ jino  
 57 Dume pi Rājāyatane samādhinā  
 vihāsi rattindivasattakaṃ muni  
 sahasanetto atha dantapoṇakaṃ  
 mukhodakaṃ cāpi adāsi satthuno  
 58 Tato mahārājavarehi ābhaṭaṃ  
 silāmayam pattaṭatukkam ekakaṃ  
 vidhāya manthaṃ madhupiṇḍikaṃ tahiṃ  
 paṭiggahetvāna sa vāṇijāhaṭaṃ  
 59 Katannakicco saraṇesu te ubho  
 paṭiṭṭhapetvāna Tapassu-Bhalluke  
 adāsi tesam abhipūjitum sakaṃ  
 parāmasitvāna siram siroruhe  
 60 Vaṭassa mūle Ajapālasaṇṇino  
 sahampatibrahmavarena yācito  
 janassa kātum varadhammasangahaṃ  
 agaṇchi Bārāṇasim ekako muni  
 61 Gantvā so dhammarājā vanam Isipatanaṃ saṇṇatānaṃ  
 niketaṃ  
 pallaṅkasmim nisinno tahiṃ avicalitaṭṭhānasampāditamhi  
 āsāhe puṇṇamāyaṃ sitaruciruciyaṃ jotite cakkavāle

devabrahmādikānaṃ duritamalaharaṃ vattayī dhamma-  
cakkam

62 Sutvā saddhammam aggaṃ tibhuvanakuharābhoga-  
vitthārikaṃ<sup>1</sup> taṃ

Aññākoṇḍaññānāmadvijamunipamukhaṭṭhārasabrahma-  
koṭi

aññāsaṃ maggadhammaṃ parimitarahite cakkavāle ulāro  
obhāso pātubhūto sapadi bahuvidhaṃ āsi accherakaṃ ca

### PAṬHAMO PARICCHEDO

---

<sup>1</sup> B. °vitthāritaṃ.

## DUTIYO PARICCHEDO.

- 1 Tato patthāya so satthā vinento devamānuse  
bodhito Phussamāsambhi navame puṇṇamāsiyaṃ
- 2 Laṅkam āgama Gaṅgāya tīre yojanavittathe  
Mahānāgavanuyyāne āyāmena tiyojane
- 3 Yakkhānaṃ samitiṃ gantvā tthatvāna gagane tahiṃ  
vātandhakāravutthihi katvā yakkhe bhayaddite
- 4 Laddhā bhayehi yakkhehi tehi dinnāya bhūmiyā  
cammakhaṇḍaṃ pasāretvā nisīditvāna taṅkhaṇe
- 5 Chammakhaṇḍaṃ padittaggijālamālāsamākulaṃ  
iddhiyā vaḍḍhayitvāna yāva sindhum samantato
- 6 Javena sindhuvelāya rāsibhūte nisācare  
Giridīpam idhānetvā paṭiṭṭhāpesi te tahiṃ
- 7 Desayitvā jino dhammaṃ tadā devasamāgame  
bahunnaṃ pāṇakoṭṭinam dhammābhisamayaṃ akā
- 8 Mahāsumanadevassa sele Sumanakūtake  
datvā namassitum kese agā Jetavanaṃ jino
- 9 Paṭiṭṭhapetvā te satthunisinnāsanabhūmiyā  
indanīlamayaṃ thūpaṃ karitvā so apūjayi
- 10 Nissāya maṇipallankaṃ pabbataṇṇavavāsino  
disvā yuddhatthike nāge Cūḷodara-Mahodare
- 11 Bodhito pañcame vasse cittaṃ mase mahāmuni  
uposathe kāḷapakke Nāgadīpam upāgami
- 12 Tadā Samiddhi Sumano devo Jetavane ttiṭṭhaṃ  
attano bhavanaṃ yeva Rājāyatanapādapaṃ
- 13 Indanīladdikūṭaṃ va gahetvā tuṭṭhamānaso  
dhārayitvā sahāgañchi chaṭṭaṃ katvāna satthuno
- 14 Ubhinnaṃ nāgarājūnaṃ vattamāne mahāhave  
nisinno gagane nātho māpayittha mahātamaṃ
- 15 Ālokaṃ dassayitvā 'tha assāsetvanā bhogino  
sāmaggikaraṇaṃ dhammaṃ abhāsi purisāsabho

- 16 Asītikotiyo nāgā acalambudhivāsino  
patitṭhahimsu muditā silesu saraṇesu ca
- 17 Datvāna maṇipallaṅkaṃ satthuno bhujagādhīpā  
tatth' āsīnaṃ mahāvīraṃ annapānehi tappayum
- 18 Patitṭhapetvā so tattha Rājāyatanapādapam  
pallaṅkaṃ taṇ ca nāgānaṃ adāsi abhipūjitum
- 19 Bodhito aṭṭhame vasse vesākhe puṇṇamāsiyaṃ  
Maṇi-akkhika-nāmena nāgindena nimantito
- 20 Nāgarājassa tass' eva bhavanaṃ sādhusajjitaṃ  
Kalyāṇiyaṃ pañca bhikkhusatehi saha āgami
- 21 Kalyāṇi-cetiyatṭhāne kate ratanamaṇḍape  
mahārahamhi pallaṅke upāvisi narūsabho
- 22 Dibbehi khajjabhojjehi sasaṅghaṃ lokanāyakaṃ  
santappesi phaṇindo so bhujagehi <sup>1</sup> purakkhato
- 23 Desayitvāna saddhammaṃ saggamokkhasukkhāvahaṃ  
so satthā Sumane kūṭe dassesi padalañchanam
- 24 Tato pabbatapādamhi sasaṅgho so vināyako  
divā vihāraṃ katvāna Dīghavāpim <sup>2</sup> upāgami
- 25 Thūpatṭhāne taṃ buddho sasaṅgho 'bhinisīdiya  
samāpattisamubbhūtaṃ avindi asamaṃ sukhaṃ
- 26 Mahābodhitaruṭṭhāne samādhim appayī jino  
Mahāthūpappadesa ca viharittha samādhinā
- 27 Thūpārāmaṃhi thūpassa ṭhāne jhānasukhena so  
sabbhikkhusaṅgho sambuddho muhuttaṃ vītināmayi
- 28 Silāthūpappadesamhi ṭhatvā kālavidū muni  
deve samanūsāsetvā tato Jetavanaṃ agā
- 29 Agiddho lābhasakkāre asayham avamānaṃ  
sahanto kevalaṃ sabbalokanittaraṇatthiko
- 30 Samvaccharāni ṭhatvāna cattālīsaṃ ca pañca ca  
desayitvāna suttādiṃ navaṅgaṃ satthusāsaṇaṃ
- 31 Tāretvā bhavakantārā jane saṅkhyātivattino  
buddhakiccāni sabbāni niṭṭhapetvāna cakkhuma
- 32 Kusinārāpure raññaṃ Mallānaṃ Upavattane  
sālavanamhi yamaka-sālarukkhānaṃ antare
- 33 Mahārahe supaṇṇatte mañce uttarasīsaṃ  
nipanno sīhaseyyāya vesākhe puṇṇamāsiyaṃ

<sup>1</sup> B. Bhujagehi.<sup>2</sup> M. Dīghavāpim.

- 34 Desetvā paṭhame yāme Mallānaṃ dhammam uttamaṃ  
 Subhaddaṃ majjhime yāme pāpetvā amataṃ padaṃ  
 35 Bhikkhū pacchimayāmamhi dhammakkhandaṃ asesake  
 saṅgayha ovaditvāna appamādapadena ca  
 36 Paccūsasamaye jhānasamāpattivihārato  
 utthāya parinibbāyi sesopadhivivajjito  
 37 Mahikampādayo āsuraṃ tadā acchariyāvahā  
 pūjā visesā vattiṃsu devamānusakā bahū  
 38 Parinibbānasuttante vuttānukkamato pana  
 pujaṃviseṣo viññeyyo icchantehi asesato  
 39 Ahatehi ca vatthehi veṭhetvā paṭhamam jinaṃ  
 veṭhayitvāna kapāsapicunā vihatena ca  
 40 Evaṃ pañcasatakkhattuṃ veṭhayitvāna sādhuṃ  
 pakkipitvā suvaṇṇāya telapunnāya doṇiyaṃ <sup>1</sup>  
 41 Viṣaṃ hatthasatubbedhaṃ gandhadāruhi saṅkataṃ  
 āropayimsu citakaṃ Mallānaṃ pamukhā tadā  
 42 Mahākassapatherena dhammarāje avandite  
 citakaṃ mā jalitthā ti devādhiṭṭhānato pana  
 43 Pāmokkhā Mallarājūnaṃ vāyamaṇṭā p' anekadhā  
 citakaṃ taṃ na sakkiṃsu gāhāpetuṃ hutāsaṇaṃ  
 44 Mahākassapatherena adhiṭṭhānena attano  
 vaṭṭhādini mahādoṇiṃ citakaṃ ca mahārahaṃ  
 45 Dvidhā katvāna nikkhamma sakasise patiṭṭhitā  
 vanditā satthuno pādā yathāṭṭhāne patiṭṭhitā  
 46 Tato devānubhāvena pajjalittha cittānalo  
 na masi satthudehassa daḍḍhass' āsi na chārikā  
 47 Dhātuyo avasissimsu muttābhā kaṇcanappabhā  
 adhiṭṭhānena buddhassa vippakiṇṇā anekadhā  
 48 Uṇhisam akkhakā dve ca catasso dantadhātuyo  
 icc ete dhātuyo satta vippakiṇṇā na satthuno  
 49 Ākāśato patitvā pi uggantvā pi mahitalā  
 samantā jaladhārāyo nibbāpesuṃ citānalaṃ  
 50 Therassa Sāriputtassa antevāsī mahiddhiko  
 Sarabhunāmako thero pabhinnapaṭisambhido  
 51 Givādhātum gaṇetvāna citato Mahiyaṅgane  
 patiṭṭhāpetvā thūpamhi akā kaṇcukacetiyaṃ

---

<sup>1</sup> M. Doṇiyā.

- 52 Khemavhayo kāruṇiko khīṇasaṃyojano muni  
 citakāto tato vāmadāṭhādadhātum samaggahi  
 53 Aṭṭhannaṃ atha rājūnaṃ dhātu-atthāya satthuno  
 uppannaṃ viggahaṃ Doṇo sametvāna dvijuttamo  
 54 Katvāna aṭṭha koṭṭhāse bhājetvā sesadhātuyo  
 adāsi aṭṭha rājūnaṃ tam-tam-nagaravāsinaṃ  
 55 Hatṭhatuṭṭhā gahetvāna dhātuyo tā narādhipā  
 gantvā sake sake raṭṭhe cetiyāni akārayum  
 56 Ekā dāṭhā Surindena ekā Gandhāravāsihi  
 ekā bhujāṅgarājūhi āsi sakkatapūjītā  
 57 Dantadhātum tato Khemo attanā gahitaṃ adā  
 Dantapure Kalingassa Brahmadattassa rājino  
 58 Desayitvāna so dhammaṃ bhetvā sabbakuditṭhiyo  
 rājānaṃ tam pasādesi aggamhi ratanattaye  
 59 Ajjhogālho munindassa dhammāmatamahaṇṇavaṃ  
 so narindo pavāhesi malaṃ macchariyādikaṃ  
 60 Pāvussako yathā meghe nānāratanaṃvassato  
 dāḷiddiyanidāghaṃ so nibbāpesi naruttamo  
 61 Suvaṇṇakhacitāmbamuttājālehi <sup>1</sup> sobhitaṃ  
 kūṭāgārasatākiṇṇaṃ taruṇādiccasannibhaṃ  
 62 Nānāratanasobbhāya duddikkhaṃ cakkhumūsaṃ  
 yānaṃ saggāpavaggassa pasādātisayāvahaṃ  
 63 Kārayitvāna so rājā dāṭhādadhātunivesanaṃ  
 dhātupīṭhaṃ ca tatth' eva kāretvā ratanujjalaṃ  
 64 Taḥiṃ samappayitvāna dāṭhādadhātum mahesino  
 pūjāvattthūhi pūjesi rattindivam atandito  
 65 Iti so sañcinitvāna puññasambhārasampadaṃ  
 cajitvā mānusaṃ dehaṃ saggakāyaṃ alaṅkari  
 66 Anujāto tato tassa Kāsirājavhayo suto  
 rajjaṃ laddhā amaccānaṃ sokasallam apānudi  
 67 Puppahagandhādinaṃ dantadhātum tam abbipūjiya  
 niccaṃ maṇippadīpehi jotayī dhātumandiraṃ  
 68 Icc' evaṃ ādiṃ so rājā katvā kusalasañcayāṃ  
 jahitvāna nijaṃ dehaṃ devindapuram ajjhagā  
 69 Suuando nāma rājindo ānandajanano satam  
 tass' atrajo tato āsi buddhasāsanamāmako

- 70 Sammānetvāna so dantadhātum ñeyyantadassino  
 mahatā bhattiyogena agā devasahavyatam  
 71 Tato param ca aññe pi bahavo vasudhādhipā  
 dantadhātum munindassa kamena abhipūjayum  
 72 Guhasīvavhaya rājā duratikkamasāsano  
 tato rajjasirim patvā anugaṇhi mahājanam  
 73 Sapatthānabhiññe <sup>1</sup> so lābhāsakkāralolupe  
 māyāvino avijjandhe Nigaṇṭhe samupaṭṭhahi  
 74 Vassāratte yathā cando mohakkhandhena āvaṭo  
 nāsakkhi guṇaramsīhi jalitum so narāsabho  
 75 Dhammamaggā apete pi pavitṭhe diṭṭhikānanam  
 tasmim sādhipatham aññe nātivattimsu paṇino  
 76 Hemataraṇamālāhi dhajehi kadalihi ca  
 pupphagghiyehi 'nekehi sajjetvā nāgarā puram  
 77 Maṅgalatthutighosehi naccagītādikehi ca  
 hemarūpiyapupphehi gandhacunṇādikehi ca  
 78 Pūjentā <sup>2</sup> munirājassa dāṭhādhatum kudācanam  
 akaṃsu ekanigghosam samvaṭṭambudhisannibham  
 79 Ugghātetvā narindo so pāsāde sihapañjaram  
 passanto janam addakkhi pūjāvidhiparāyanam  
 80 Athāmaccasabhāmajjhe rājā vimhitamānaso  
 kotūhalākulo hutvā idam vacanam abravī  
 81 Accherakam kim etan nu kīdisam pāṭihāriyam  
 mam etaṃ nagaram kasmā chaṇanissitakam iti  
 82 Tato amacco ācikkhi medhāvi buddhamāmakō  
 rājino tassa sambuddhānubhāvam avijānato  
 83 Sabbābhibhussa buddhassa taṇhāsāṅkhayadassino  
 esā dhātu mahārāja Khemattherena āhaṭā  
 84 Tam dhātum pūjayitvāna rājāno pubbakā idha  
 kalyāṇamitte nissāya devakāyam upāgamum  
 85 Nāgarā pi ime sabbe samparāyasukhatthikā  
 pūjayanti samāgamma dhātum taṃ satthuno iti  
 86 Tassāmacassa so rājā sutvā dhammasubhāsitaṃ <sup>3</sup>  
 dulladdhimalam ujjhivā pasīdi ratanattaye  
 87 Dhātupūjam karonto so rājā acchariyāvaham

<sup>1</sup> B. °nabhiñño.<sup>2</sup> B. pujento.<sup>3</sup> M. dhammam.

- titthiye dummane 'kāsi sumane c' etare jane  
 88 Ime ahirikā sabbe saddhādiguṇavajjitā  
 thaddhā saṭhā ca duppaññā saggamokkhavibādhakā <sup>1</sup>  
 89 Iti so cintayitvāna Guhasīvo narādhipo  
 pabbājesi sakā raṭṭhā Nigaṇṭhe te asesake  
 90 Tato Nigaṇṭhā sabbe pi ghatasittānalā yathā  
 kodhaggijalitā 'gañchum puram Pāṭaliputtakam  
 91 Tattha rājā mahātejo Jambudīpassa issaro  
 Paṇḍunāmo tadā āsi anantabalavāhaṇo  
 92 Kodhandhā 'tha Nigaṇṭhā te sabbe pesuññakārakā  
 upasaṅkamma rājānam idaṃ vacanam abravum  
 93 Sabbadevamanussehi vandaniye mahiddhike  
 Siva-brahmādayo deve niccam tumhe namassatha  
 94 Tuyham sāmantabhūpālo Guhasīvo panādhunā  
 nindanto tādise deve chavaṭṭhiṃ vandate iti  
 95 Sutvāna vacanam tesam rājā kodhavasānugo  
 Sūram sāmantabhūpālam Cittayānam ath' abravī  
 96 Kālingaratṭham gantvāna Guhasīvam idhānaya  
 pūjitam taṃ chavaṭṭhiṃ ca tena rattindivam iti  
 97 Cittayāno tato rājā mahatiṃ caturāṅginim  
 sannayhitvā sakam senam purā tamhā 'bhinikkhami  
 98 Gantvāna <sup>2</sup> so mahīpālo senaṅgehi purakkhato  
 Dantapurassāvidūre khandhāvāram nivesayi  
 99 Sutvā āgamanam tassa Kālingo <sup>3</sup> so mahīpati  
 gajindapābhatādihi taṃ tosesi narādhipam  
 100 Hitajjhāsayatam nātvā Guhasīvassa rājino  
 Dantapuram Cittayāno saddhiṃ senāya pāvisi  
 101 Pākāragopurattālapāsādagghikacittitam  
 dānasālāhi so rājā samiddham puram addasa  
 102 Tato so sumano gantvā pavitṭho rājamandiram  
 Guhasīvassa ācikkhi Paṇḍurājassa sāsanam  
 103 Sutvāna sāsanam tassa dāruṇam duratikkamam  
 pasannamukhavaṇṇo va Cittayānam samabravi  
 104 Sabbalokahitatthāya maṃsanettādidānato  
 anappakappe sambhāre sambharitvā atandito

<sup>1</sup> M. vibandhakā.<sup>2</sup> B. gatvana.<sup>3</sup> M. Kalingo.

- 105 Jetvā namucino senaṃ patvā sabbāsavakkhayaṃ  
anāvaraṇañāṇena sabbadhammesu pāragu  
106 Diṭṭhadhammasukhassādaṃ agaṇetvāna attano  
dhammanāvāya tāresi janataṃ yo bhavaṇṇavā  
107 Devātidevaṃ taṃ buddhaṃ saraṇaṃ sabbapāṇinaṃ  
jano hi avajānanto addhā so vañcito iti  
108 Icc' evaṃ ādiṃ sutvāna so rājā satthu vaṇṇanaṃ  
ānandassuppabandhehi pavedesi pasannataṃ  
109 Guhasīvo pasannaṃ taṃ Cittayānaṃ udikkhiya  
tena saddhiṃ mahagghaṃ taṃ agamā dhātumandiraṃ  
110 Haricandanasambhūtadvārabāhādikehi <sup>1</sup> ca  
pavālavāḷamālāhi lambamuttālatāhi ca  
111 Indanīlakavāṭehi maṇikinkīṇikāhi ca  
sovaṇṇakaṇṇamālāhi sobhitaṃ maṇithūpikaṃ  
112 Uccaṃ veluriyubbhāsichadanaṃ makarākulaṃ  
dhātumandiraṃ adakkhi ratanujjalapīṭhakaṃ  
113 Tato setātapattassa heṭṭhā ratanacittitaṃ  
disvā dhātukaraṇaṃ ca tuṭṭho vimhayaṃ ajjhagā  
114 Tato Kālīṅganātho <sup>2</sup> so vivaritvā karaṇḍakaṃ  
mahitale nihantvāna dakkhiṇaṃ jānumaṇḍalaṃ  
115 Añjaliṃ paggaḥetvāna guṇe dasabalādike  
saritvā buddhasetṭhassa akāsi abhiyācanaṃ  
116 Gaṇḍambarukkkhamūlamhi tayā titthiyamaddane  
yamakaṃ dassayantena pāṭihāriyaṃ abbhutaṃ  
117 Pubbakāyādinikkhantajalāṇalasamākulaṃ  
cakkavāḷaṅgaṇaṃ katvā janā sabbe pasādītā  
118 Desetvāna tayo māse Abhidhammaṃ sudhāsināṃ  
nagaraṃ otarantena Saṅkassaṃ Tāvatisato  
119 Chattacāmarasaṅkhādīgāhakehi anekadhā  
brahmadevāsuraḍḍihi pūjiteṇa tayā pana  
120 Ṭhatvāna maṇisopāṇe Vissakammābhiniṃmite  
Lokavivaraṇaṃ nāma dassitaṃ pāṭihāriyaṃ  
121 Tathā 'nekesu ṭhānesu munirāja tayā puna  
bahūni pāṭihīrāni dassitāni sayambhunā

<sup>1</sup> M. sambhūtaṃ.<sup>2</sup> B. Kālīṅga; comp. III. 7.

- 122 Pāṭihāriyam ajjāpi saggamokkhasukhāvahaṃ  
passantānaṃ manussānaṃ dassanīyaṃ tayā iti
- 123 Abbhuggantvā gagaṇakuharaṃ <sup>1</sup> candalekhābhirāmā  
vissajjenti rajatadhavalā raṃsiyo dantadhātu <sup>2</sup>  
dhūpāyanti sapadi bahudhā pajjalanti muhuttaṃ  
nibbāyanti nayanasubhagaṃ pāṭihīraṃ akūsi
- 124 Accheraṃ taṃ paramaruciraṃ Cittayāno narindo  
disvā haṭṭho ciraparicitaṃ diṭṭhijālaṃ jahitvā  
gantvā buddhaṃ saraṇaṃ asaṃsaṃ sabbaseṇīhi saddhiṃ  
aggam puññaṃ pasavi bahudhā dhātusammānanāya

## DUTIYO PARICCHEDO

<sup>1</sup> B. M. gagaṇa.<sup>2</sup> B. °dhātum.

## CHAPTER III.

- 1 Tato Kaliṅgādhipatissa tassa  
so Cittayāno paramappito  
taṃ sāsanaṃ Paṇḍunarādhīpassa  
ñāpesi dhīro duratikkaman ti
- 2 Rājā tato Dantapuram dhajehi  
pupphehi dhūpehi ca toraṇehi  
alaṅkaritvāna mahāvitāna-  
nivāritādiccamarīcijālaṃ
- 3 Assuppabandhāvutalocanehi  
purakkhato negamanāgarehi  
samubbahanto sirasā nijena  
mahārahaṃ dhātukaraṇḍakaṃ taṃ
- 4 Samussitodārasitātapattaṃ  
saṅkhodarodātaturāṅgayuttaṃ  
rathaṃ navādiccasamānavañṇam  
āruyha cittattharaṇābhīrāmaṃ
- 5 Anekaśaṅkhehi balehi saddhiṃ  
velātivattambudhisannibhehi  
nivattamānassa bahujjanassa  
vinā pi dehaṃ manasānuyāto
- 6 Susanthataṃ sabbadhi vālukāhi  
susajjitaṃ puṇṇaghaṭṭadīkehi  
pupphābhikiṇṇaṃ paṭipajja dīghaṃ  
suvitthataṃ Pāṭaliputtamaggaṃ
- 7 Kaliṅganātho kusumādīkehi  
naccehi gītehi ca vāditehi  
dine dine addhani dantadhātum  
pūjesi saddhiṃ vanadevatāhi
- 8 Suduggamaṃ sindhumahīdharehi  
kameṇa-m-addhānaṃ atikkamitvā  
ādāya dhātum manuḍādhinātho  
agā puram Pāṭaliputtanāmaṃ

- 9 Rājādhirājo 'tha sabbhāya majjhe  
disvāna taṃ vītabhayam viṣaṅkam  
Kaliṅgarājāṃ paṭighābbhibhūto  
abhāsi pesuṇṇakare Nigaṇṭhe
- 10 Deve jahitvāna namassanīye  
chavaṭṭhim etena namassitaṃ taṃ  
aṅgārārāsīmhi sajotibhūte  
nikkhippa khippaṃ dahathādhuneti
- 11 Pahatṭhacittā va tato Nigaṇṭhā  
rājaṅgane <sup>1</sup> te mahatiṃ gabhīraṃ  
vitaccikaṅgārakarāsipuṇṇaṃ  
aṅgārakāsuṃ abhisāṅkharimsu
- 12 Samantato pajjalitāya tāya  
sajotiyā Roruvabheravāya  
mohandhabhūtā atha titthiyā te  
taṃ dantadhātum abhinikkhipimsu
- 13 Tassānubhāvena taṃ aggirāsīm  
bhetvā sarojaṃ rathacakkamattaṃ  
samantato uggatareṇujālam  
utthāsi kiṇṇajakkhabharābhirāmaṃ.
- 14 Tasmīṃ khaṇe paṅkajakaṇṇikāya  
patitṭhabhitvā jinadantadhātu  
kundāvadātāhi pabbāhi sabbā  
disā pabbāsesi pabhassarāhi
- 15 Disvāna taṃ acchariyaṃ manussā  
pasannacittā ratanādikehi  
sampūjayitvā jinadantadhātum  
sakaṃ sakaṃ ditṭhim avossajimsu
- 16 So Paṇḍurājā pana ditṭhijālam  
cirānubaddhaṃ apariccajanto  
patitṭhapetvā 'dhikaranyam <sup>2</sup> etaṃ  
kūṭena ghātāpayi dantadhātum
- 17 Tassaṃ nimuggā 'dhikaranyam <sup>2</sup> esā  
upaḍḍhabbhāgena ca dissamānā  
pubbācalaṭṭho va sudhāmarīci  
jotesi raṃsihi disā samantā

<sup>1</sup> M. aṅgaṇe.<sup>2</sup> M. B. here at vv. 21, 25 °karaṇṇaṃ.

- 18 Disvānubhāvaṃ jinadantadhātuyā  
 āpajji so vimhayam aggarājā  
 eko 'tha issāpasuto nigaṇṭho  
 taṃ rājarājānaṃ idaṃ avoca
- 19 Rāmādayo deva Janaddanassa  
 nānāvatarā bhuvane ahesuṃ  
 tass' ekadeso va idaṃ chavatṭhi  
 no ce 'nubhāvo katham īdiso ti
- 20 Addhā manusattam upāgatassa  
 devassa pacchā tidivaṃ gatassa  
 dehekadeso ṭhapito hitattham  
 etan ti saccaṃ vacanaṃ bhaveyya
- 21 Saṃvaṇṇayitvāna guṇe pahūte  
 Nārāyaṇass' assa mahiddhikassa  
 nimuggam ettādhikarāṇyaṃ etaṃ  
 sampassato me bahi nīharitvā
- 22 Sampādayitvāna mahājanānaṃ  
 mukhāni paṅkeruhasundarāni  
 yathicchitaṃ gaṇhatha vatthujātaṃ  
 icc āha rājā mukhare nigaṇṭhe
- 23 Te titthiyā Viṇhusuraṃ guṇehi  
 vicittarūpehi abhitthavitvā  
 toyena sañcimsu saṭhā tathā pi  
 ṭhitappadesā na calittha dhātu
- 24 Jigucchamāno atha te nigaṇṭhe  
 so dhātuyā nīharaṇe upāyaṃ  
 anvesamāno vasudhādhinātho  
 bheriṃ carāpesi sake puramhi
- 25 Nimuggam etthādhikarāṇyaṃ ajja  
 yo dhātum etaṃ bahi nīhareyya  
 laddhāna so issariyaṃ mahantaṃ  
 rañño sakāsā sukham essatī ti
- 26 Sutvāna taṃ bheriravaṃ ulāraṃ  
 puññatthiko buddhabale pasanno  
 tasmim pure setṭhisuto Subhaddo  
 pāvekkhī rañño samitiṃ pagabbho
- 27 Tam aggarājaṃ atha so namitvā  
 sāmājikānaṃ hadayaṅgamāya

- bhāsāya sabbaññugunappabhāvaṃ  
 vaṇṇesi sārājjavimuttacitto  
 28 Bhūmiṃ kiṇitvā mahatā dhanena  
 manoramaṃ Jetavanaṃ vihāraṃ  
 yo kārayitvāna jinassa datvā  
 upatṭhahī taṃ catupaccayehi  
 29 Anāthapiṇḍappadasetṭhissetṭho  
 so diṭṭhadhammo papitāmaho me  
 tilokanāthe mama dhammarāje  
 tumhe 'dhunā passatha bhattibhāraṃ  
 30 Itthaṃ naditvāna pahūtapañño  
 katvāna ekaṃsam ath' uttarīyam  
 mahitalaṃ dakkhiṇajānukena  
 āhacca baddhañjaliko avoca  
 31 Chaddanta-nāgo savisena viddho  
 sallena yo lohitamakkhitaṅgo  
 chabbaṇṇaraṃsīhi samujjalante  
 chetvāna luddāya adāsi dante  
 32 Saso pi hutvāna visuddhasīlo  
 ajjhataḍḍānābhīrato dvijāya  
 yo dajji deham pi sakam nipacca  
 aṅgārārāsīmhi bubhukkhīyā  
 33 Yo bodhiyā bāhiravatthudānā  
 atittarūpo Sivirājasetṭho  
 adāsi cakkhūni pabhassarāni  
 dvijāya jiṇṇāya acakkhukāya  
 34 Yo khantivādī pi Kalāburāje  
 chedāpayante pi sahatthapādaṃ  
 pariḷutaṅgo rudhire titikkhī  
 mettāyamāno yasadāyake 'va  
 35 Yo Dhammapālo api sattamāsa-  
 jāto paduṭṭhe janake sakamhi  
 kārapayante asimālakammaṃ  
 cittaṃ no dūsesi Patāparāje  
 36 Sākhāmigo yo asatā pumena  
 vane papātā sayamuddhaṭṭena  
 silāya bhinne pi sake lalāṭe  
 taṃ khemabhūmiṃ anayittha mūlhaṃ

- 37 Rutṭhena māren' abhinimmitam pi  
 aṅgārakāsum jalitaṃ vibhijja  
 sāmūtṭhite sajju mahāravinde  
 ṭhatvāna yo setṭhi adāsi dānaṃ
- 38 Migena yenopavijaññaṃ ekaṃ  
 bhitaṃ vadhā mocayituṃ kuraṅgiṃ  
 āghātane attasiraṃ ṭhapetvā  
 pamocitā 'ññe api paṇisaṅghā
- 39 Yo sattavasso visikhāya paṃsu-  
 kilāparo Sambhavanāmakko pi  
 sabbaññulīhāya nigūlhapaññaṃ  
 puttṭho viyākāsi Sucīratena
- 40 Hitvā nikantiṃ<sup>1</sup> sakajivite pi  
 baddhā sakucchimhi ca vettavallīṃ  
 sākhamige nekasahassasaṅkhe  
 vadhā pamocesi kapissaro yo .
- 41 Santappayaṃ dhammasudhārasena  
 yo mānuse Tuṇḍilasūkaro pi  
 isi va katvā atha ñāyagantaṃ  
 nijaṃ pavattesi cirāya dhammaṃ
- 42 Paccatthikaṃ Puṇṇakayakkham uggaṃ  
 mahiddhikaṃ kāmagaṇesu giddhaṃ  
 yo tikkhapañño Vidhurābhiddhāno  
 dāsesi Kālāgiri-matthakamhi
- 43 Kulāvasāyī avirūlhapakkho  
 yo buddhimā vaṭṭakapotako pi  
 saccena dāvaggim abhijjalantaṃ  
 vassena nibbāpayi vārido 'va
- 44 Yo maccharājā pi avuṭṭhikāle  
 disvāna macche tasite kilante  
 saccena vākyena mahoghapaṇṇaṃ  
 muhuttamattena akāsi raṭṭhaṃ
- 45 Vicittahatthassarathādikāni  
 vasundharākampanakāraṇāni  
 putte 'nujāte sadise ca dāre  
 yo dajji Vessantarajātiyaṃ pi

---

<sup>1</sup> B. Hitvāna kantiṃ.

- 46 Buddho bhavitvā api diṭṭhadhamma-  
sukhānapekkho karuṇānuvattī  
sabbam saṁto avamānanādiṁ  
yo dukkaram lokahitam akāsi
- 47 Balena saddhiṁ caturaṅgikena  
abhiddavantam atibhāsanena  
ajeyyasattham paramiddhipattam  
damesi yo Ālavakam pi yakkham
- 48 Dehābhinikkhantahutāsanacci-  
mālākulam brahmabhavam karitvā  
bhetvāna diṭṭhiṁ sucirānubaddham  
vinesi yo brahmavaram munindo
- 49 Accaṅkusam dhānasudhotagaṇḍam  
nipātitaṭṭālakagopurādiṁ  
dhāvantaṁ agge Dhanapālahatthiṁ  
damesi yo dāruṇam antakam va
- 50 Manussarattāruṇapāṇipādam  
ukkippa khaggaṁ anubandhamānam  
mahādayo duppasaham parehi  
damesi yo Aṅgulimālacoram
- 51 Yo dhammarājā vijitārisaṅho  
pavattayanto varadhammacakkam  
saddhammasaññaṁ ratanākaraṁ ca  
ogāhayī sam parisam samaggaṁ
- 52 Tass 'eva saddhammanarādhipassa  
Tathāgatass' appaṭipuggalassa  
anantaññaṁ visāradassa  
esā mahākāruṇikassa dhātu
- 53 Anena saccena jinassa dhātu  
khippam samāruyha nabhantarālam  
sudhamasulekheva samujjalanti  
kaṅkham vinodetu mahājanassa
- 54 Tasmiṁ khaṇe sā jinadantudhātu  
nabham samuggamma pabhāsanti  
sabbā disā osadhitārakā va  
janam pasādesi vitiṇṇakaṅkham
- 55 Atho taritvā gaganāṅganamhā  
sā matthake seṭṭhisutassa tassa

- patitṭhahitvāna sudhābhisitta-  
 gattam va tam piṇayi bhattininnam  
 56 Disvāna tam acchariyam nigaṇṭhā  
 icc abravum Paṇḍunarādhīpaṃ tam  
 vijjābalaṃ seṭṭhisutassa etaṃ  
 na dhātuyā deva ayaṃ pabbhavo  
 57 Nisamma tesam vacanaṃ narindo  
 icc abravī seṭṭhisutam Subhaddam  
 yathā ca ete abhisaddaheyyum  
 tathāvidham dassaya iddhim aññaṃ  
 58 Tato Subhaddo tapanīyapatte  
 sugandhisītodakapūritamhi  
 vaḍḍhesi dhātum munipuṇḍavassa  
 anussaranto caritabbhutāni  
 59 Sā rājahaṃsīva vidhāvamānā  
 sugandhitoyamhi padakkhiṇena  
 ummujjamānā ca nimujjamānā  
 jane pamodassudhare akāsi  
 60 Tato ca kāsū visikhāya majjhe  
 katvā taṃ dhātum abhikkhipitvā  
 paṃsūhi sammā abhipūrayitvā  
 bahūhi maddāpayi kuṇḍjarehi  
 61 Bhetvā maṃ utṭhahi cakkamattam  
 virājamānaṃ maṇikaṇṇikāya  
 pabhassaraṃ rūpiyakesarehi  
 saroruhaṃ kañcanapattapāliṃ  
 62 Patitṭhahitvāna taṃ saroje  
 mandānilāvattitareṇujāle  
 obhāsayaṃti va disā pabbhāhi  
 diṭṭhā muhuttana jinassa dhātu  
 63 Khipiṃsu vatthābharāṇāni maccā  
 pavassayum pupphamayam<sup>1</sup> ca vassam  
 ukkuṭṭhisaddehi ca sādhuḥkāra-  
 nādehi puṇṇam nagaram akāṃsu  
 64 Te titthiyā naṃ<sup>2</sup> abhivañcanan ti  
 rājādhirājaṃ atha saññāpetvā

<sup>1</sup> Sic. B. M.<sup>2</sup> M. tam.

- jigucchaniye kuṇapādikehi  
 khipiṃsu dhātum parikhāya piṭṭhe  
 65 Tasmim khaṇe pañcavidhambujehi  
 sañchādītā hamsagaṇopabhuttā  
 madhubbatālīvirutābhirāmā  
 ahosi sā pokkharanī va Nandā  
 66 Mataṅga<sup>2</sup>jā<sup>2</sup> koṇcaravaṃ raviṃsu  
 kariṃsu hesāninadaṃ turaṅgā  
 ukkuṭṭhinādaṃ akariṃsu maccā  
 suvādītā dundubhi-ādayo pi  
 67 Thomiṃsu maccā thutigītakehi  
 nacciṃsu ottappavibhūsanā pi  
 vatthāni sīse bhamayiṃsu mattā  
 bhujāni pothesum udaggacittā  
 68 Dhūpehi kālāgarusambhavehi  
 ghanāvanaddhaṃ va nabhaṃ ahosi  
 samussitānekadhajāvalihi  
 puraṃ tadā vatthamayam akāsi  
 69 Disvā tam accheram acintaniyam  
 āmoditā maccagaṇā samaggā  
 atthe niyojetum upecca tassa  
 vadiṃsu Paṇḍussa narādhipassa  
 70 Disvāna yo īdisakam pi rāja  
 iddhānubhāvaṃ munipuṅgavassa  
 pasādamattam pi kareyya no ce  
 kimatthiyā tassa bhaveyya paṇṇā  
 71 Pasādaniyesu guṇesu rāja  
 pasādanaṃ sādhu-janassa dhammo  
 pupphanti sabbe sayam eva cande  
 samuggate komudakānanāni  
 72 Vācāya tesam pana dummatīnaṃ  
 mā saggamaggaṃ pajahittha rāja  
 andhe gahetvā vicareyya ko hi  
 anvesamāno supathaṃ amūlho  
 73 Narādhipā Kappiṇa-Bimbisāra-  
 Suddhodanādī api tejavantā

---

<sup>1</sup> M. Gajādhipā.

- taṃ dhammarājaṃ saraṇaṃ upecca  
 pivimsu dhammāmatam ādarena  
 74 Sahassanetto tidisādhipo pi  
 khīṇāyuko khīṇabhavaṃ munindaṃ  
 upecca dhammaṃ vimalaṃ nisamma  
 alaṭṭha āyuṃ api diṭṭhadhammo  
 75 Tuvam pi tasmaṃ jītapañcamāre  
 devātideve varadhammarāje  
 saggāpavaggādhigamāya khippaṃ  
 cittaṃ pasādehi narādhirāja  
 76 Sutvāna tesam vacanaṃ narindo  
 vitinṇakaṅkho ratanattayamhi  
 senāpatiṃ atthacaraṃ avoca  
 pahatṭhabhāvo parisāya majjhe  
 77 Asaddahāno ratanattayassa  
 guṇe bhavacchedanakāraṇassa  
 cirāya dulladdhipathe caranto  
 ṭhito sarajje api vañcito 'haṃ  
 78 Mohena khajjopanaṃ dhamesaṃ  
 sitaddito dhūmasikhe jalante  
 pipāsito sindhujalaṃ pahāya  
 pivim pamādena marīcitoyaṃ  
 79 Pariccajitvā amataṃ cirāya  
 jīvattthiko tikkhaviṣaṃ akhādīṃ  
 vihāya 'haṃ campakapupphadāmaṃ  
 adhārayim jattusu nāgabhāraṃ  
 80 Gantvāna khippaṃ parikhāsamīpaṃ  
 ārādhayitvā jinadantadhātum  
 ānehi pūjāvidhinā karissaṃ  
 puññāni sabbattha sukhāvahāni  
 81 Gantvā tato so parikhāsamīpaṃ  
 senādhinātho paramappatīto  
 dhātum munindassa namassamāno  
 ajjhesi rañño hitam ācaranto  
 82 Cirāgataṃ diṭṭhimalaṃ pahāya  
 alaṭṭha saddhaṃ sugate narindo  
 pāsādam āgamma pasādam assa  
 vaddhehi rañño ratanattayamhi

- 83 Tasmim̐ khaṇe pokkharanī vicittā  
 phullehi sovaṇṇasaroruhehi  
 alaṃkarontī gaganam̐ ahosi  
 Mandākinī vābhinaṇvātārā
- 84 Haṃsaṅganevātha munindadhātu  
 sā paṅkajā paṅkajam okkamantī  
 kundāvadātāhi pabhāhi sabbam̐  
 khīrodakucchim̐ va puram̐ akāsi
- 85 Tato surattañjalipaṅkajamhi  
 patitṭṭhahitvāna camūpatissa  
 sandissamānā mahatā janena  
 mahapphalam̐ mānusakam̐ akattha
- 86 Sutvāna vuttantam̐ imam̐ narindo  
 pabaṭṭhabbhāvo padasā va gantvā  
 saṃsūcayanto diguṇam̐ pasādam̐  
 suvimhito pañjaliko avoca
- 87 Vohāradakkhā manujā muninda  
 saṅghaṭṭayitvā nikasopalamhi  
 karonti aggham̐ varakañcanassa  
 eso hi dhammo carito purāṇo
- 88 Maṇim̐ pasatthākarasambhavam̐ pi  
 hutāsakammehi 'bhisāṅkharitvā  
 pāpenti rājaññakirīṭakoṭim̐  
 vibhūsanattham̐ viduno manussā
- 89 Vimamsanatthāya tavādhunā pi  
 mayā katam̐ sabbam̐ imam̐ muninda  
 āguṇm̐ mahantam̐ khama bhūripaṇña  
 khippam̐ mamālaṅkuru uttamaṅgam̐
- 90 Patitṭṭhitā tassa tato kirite  
 maṇippabhābhāsini dantadhātu  
 amuñci raṃsī dhavalā pajāsu  
 sinehajātā iva khīradhārā
- 91 So dantadhātum̐ sirasā vahanto  
 padakkhiṇam̐ tam̐ nagaram̐ karitvā  
 sampūjayanto kusumādikehi  
 susajjitantepuram̐ <sup>1</sup> āharittha

---

<sup>1</sup> B. antopuram̐.

- 92 Sumussitodārasitātapatte  
 pallāṅkasetṭhe ratanujjalamh -  
 patiṭṭhapetvāna jīnassa dhātum  
 pūjesi rājā ratanādikehi
- 93 Buddhādivatthuttayam eva rājā  
 āpāṇakoṭim saraṇam upecca  
 hitvā vihiṃsam karuṇādhivāso  
 ārādhayī sabbajanam guṇehi
- 94 Kāresi nānāratanaṇṇapabbhāhi  
 sahaṣṣaraṃsī va virocamānam  
 narādhīpo bhattibharānurūpaṃ  
 sucittitaṃ dhātunivesanam pi
- 95 Vaddhesi so dhātugharam pi dhātum  
 alaṅkaritvā sakalam puram pi  
 sesena pūjāvidhinā atitto  
 pūjesi ratṭham sadhanam sabhogam
- 96 Āmantayitvā Guhasīvarājam  
 sammānitam attasamam karitvā  
 dānādikaṃ puṇṇam anekarūpaṃ  
 saddhādhano saṅcini rājasetṭho
- 97 Tato so bhūpālo kumatijanasamsaggam anayam  
 nirākatvā magge sugatavacanujjotasugame  
 padhāvanto sammā saparahitasampatticaturō  
 pasattham lokattham acari caritāvajjitajano

TATIYO PARICCHEDO.

## CATUTṬHO PARICCHEDO.

- 1 Carati dharāṇipāle rājadhammesu tasmim  
samaracaturaseno Khīradhāro narindo  
nijabhujabalalilā 'rātiddappammāthī  
vibhavajanitamāno yuddhasajjo 'bhigañchi
- 2 Karivaram atha disvā so gubhādvārayātaṃ  
paṭibhayarahitatto sīharājā va rājā  
nijanagarasamīpāyātaṃ etaṃ narindaṃ  
amitabalamahoghen' ottharanto 'bhiyāyi
- 3 Uditabahaladhūlipāliruddhantaḷikkho<sup>1</sup>  
samadavividdhayodhārāvasaṃrambhabhīme  
nisitasarasatālīvassadhārākarāle<sup>2</sup>  
ajini mahati yuddhe Paṇḍuko Khīradhāraṃ
- 4 Atha narapatiseṭṭho saṅgahetvāna raṭṭhaṃ  
nijatanujavarasmim rajjabhāraṃ nidhāya  
sugatadasanadhātum sampatīcchāpayetvā  
pahiṇi ca Guhasīvaṃ sakkaritvā saratthaṃ
- 5 Suciram avanipālo saññamaṃ ajjhupeto  
vividhavibhavadānā yācake tappayitvā  
tidasapurasaṃmājaṃ dehabhedā payāto  
kusalaphalam anappaṃ patthitaṃ paccalattha
- 6 Narapati Guhasīvo taṃ munindassa dhātum  
sakapuram upanetvā sādhu sammānayanto  
sugatigamanamagge paṇiṇo yojayanto  
sucaritaṃ abhirūpaṃ sañcinanto vihaṇi
- 7 Aṅgaṇitamahimass' Ujjenirañño tanūjo  
purimavayasi yev' āradhasaddhābhiyogo  
dasabalatanudhātum pūjitaṃ tassa rañño  
puravaram upayāto Dantanāmo kumāro

<sup>1</sup> M. °bahaḷa° and °rundha°.<sup>2</sup> M. °karāle°

- 8 Guṇajanitapasādaṃ taṃ Kalingādhināthaṃ  
 nikhilaguṇanivāso so kumāro karitvā  
 vividhamahavidhānaṃ sādhu sampādayanto  
 avasi sugatadhātum anvahaṃ vandamāno
- 9 Abhavi ca Guhasīvassāvanīsassa dhītā  
 vikacakuvalayakkhī haṃsakantābhiyātā  
 vadanajitasarojā hāridhammillabhārā  
 kucabharanamitaṅgī Hemamālābhidhānā
- 10 Akhilaguṇanidhānaṃ bandhubhāvānurūpaṃ  
 suvimalakulajātaṃ taṃ kumāraṃ viditvā  
 narapati Guhasīvo attano dhītaraṃ taṃ  
 adadi sabahumānaṃ rājaputtassa tassa
- 11 Manujapati kumāraṃ dhāturakkhādhdhikāre  
 pacuraparijanaṃ taṃ sabbathā yojayitvā  
 gavamahisasaḥassādihi sampiṇayitvā  
 sakavibhavasarikkhe issaratte tṭhapesi
- 12 Samarabhuvi vinatṭhe Khiradhāre narinde  
 Malayavanam upetā bhāgineyyā kumārā  
 pabalam atimahantaṃ saṃharitvā balaggaṃ  
 upapuram upagañchum dhātuyā gaṇhaṇattham
- 13 Atha nagarasamīpe te nivesaṃ karitvā  
 savaṇakatukam etaṃ sāsanaṃ pesayimsu  
 sugatadasanadhātum dehi vā khippam amhaṃ  
 yasaṃsiriṇaṇaṃ vā kiḷa saṃgāmakeliṃ
- 14 Sapadi dharanipālo sāsanaṃ taṃ suṇitvā  
 avadi rahasi vācaṃ rājaputtassa tassa  
 na hi sati mama dehe dhātum aññassa dassaṃ  
 aham api yadi jetaṃ n'eva te sakkuṇeyyaṃ
- 15 Suranaranamitaṃ taṃ dantadhātum gahetvā  
 gahitadijavilāso<sup>1</sup> Sihaḷaṃ yāhi dīpaṃ  
 iti vacanaṃ udāraṃ mātulassātha sutvā  
 tam avaca Guhasivaṃ Dantanāmo kumāro
- 16 Tava ca mama ca ko vā Sihaḷe bandhubhūto  
 jinacaraṇasaroje bhattiyutto ca ko vā  
 jalanidhiparatīre Sihaḷaṃ khuddadesaṃ  
 katham aham atinessaṃ dantadhātum jinassa

<sup>1</sup> B. here and below 21, 43 °dvija° (comp. 18°).

- 17 Tam avadi Guhasīvo bhāgineyyaṃ kumāraṃ  
dasabalatanudhātū saṅṭhitā Sihalasmiṃ  
bhavabhayaahatidakkho vattate satthu dhammo  
gaṇanapaṭham atītā bhikkhavo cāvasimsu
- 18 Mama ca piyasahāyo so Mahāsenarājā  
jinacaraṇa sarojadvandasevābhiyutto  
salilam api ca phutṭhaṃ dhātuyā patthayanto  
vividharataṇajātaṃ pābhaṭaṃ pesayittha
- 19 Pabhavati manuḍindo sabbadā buddhimā so  
sugatadasanadhātum pūjitaṃ pūjaneyyaṃ  
paricitaṭisayaṃhā vip̐pavutthaṃ bhavantaṃ  
vividhaviḃhavadānā sādhu saṅgaṇhitaṃ ca
- 20 Nijaduhita patim̐ taṃ itthaṃ ārādhayitvā  
narapati Guhasīvo saṅgaḃhetvāna senaṃ  
raṇadharaniṃ upeto so kumārehi saddhiṃ  
maraṇaparavasattaṃ ajjhagā yujjhamāno
- 21 Atha narapatiputto Dantaṇāmo suṇitvā  
savaṇakaṭukaṃ etaṃ mātulassa ppavattiṃ  
gaḃhitadiḃavilāso dantadhātum gaḃetvā  
turitaturitaḃhūto so puram̐hā palāyi<sup>1</sup>
- 22 Sarabhasaṃ upagantvā dakkhiṇaṃ cātha desaṃ  
avicalitasab̐hāvo iddhiyā devatānaṃ  
nadim̐ atimaḃatiṃ so uttaritvāna puṇṇaṃ  
nidahi dasanadhātum vālukaṛāsimaḃjje
- 23 Puna puram̐ upagantvā taṃ gaḃitaññavesaṃ  
bhariyaṃ api gaḃetvā āgato tattha khippaṃ  
sugatadasanadhātum vālukaṭhūpakucchiṃ  
ṭhapitaṃ upacaranto acchi gumbantaraṃsmiṃ
- 24 Sapaḃi nabhasi thero gaḃcchamāno paṇ' eko  
vividhakiṛaṇajālaṃ vālukaṛāsithūpā  
aviraḃlitaṃ<sup>2</sup> uḃentaṃ dhātūyā tāya diṣvā  
paṇami sugatadhātum otaritvāna tattha
- 25 Munisutaṃ atha diṣvā jampaṭī te patitā  
nijagamaṇavidhānaṃ sabbam̐ ārocayimsu  
dasabalatanuḃo so dhāturaḃkkaṇiyutto  
paraḃhitaṇiraṭatto te ubho ajjhab̐hāsi

<sup>1</sup> M. palāyi ; B. palāyi.<sup>2</sup> M. aviraḃlitaṃ.

- 26 Dasabalatanudhātum Sihaḷam netha tumhe  
 agaṇitatanubhedā vītasārajjam etaṃ  
 api ca gamanamagge jātamatte vighāte  
 saratha mamam anekopaddavacchedadakkham
- 27 Iti sugatatanujo jampatiīnaṃ kathetvā  
 puna pi tad anurūpaṃ desayitvāna dhammaṃ  
 puthutaram apanetvā sokasallam ca gālham  
 sakavasatim upetā antaḷikkhena dhīro
- 28 Bhujagabhavanavāsi <sup>1</sup> ninnagāyātha tassā  
 bhujagapati mahiddhī Paṇḍubhārābhiddhāno  
 sakapurapavarambā nikkhamitvā caranto  
 samupagami tadā taṃ ṭhānaṃ icchāvasena
- 29 Vimalapulinathūpā so samuggacchamānaṃ  
 sasiruciramarīcijjālam <sup>2</sup> ālokayitvā  
 ṭhitam atha munidhātum vālukārāsiggabbhe  
 kim idam iti sakaṅkham pekkhamāno avedi
- 30 Sapaḍi sabahumāno so asandissamāno  
 ratanamayakaraṇaṃ dhātuyuttam gilitvā  
 vitataputhuladeho bhogamālāhi tuṅgaṃ  
 kanakasikharirājaṃ vethayitvā sayittha
- 31 Salilanidhisamīpaṃ jampatī gantukāmā  
 pulinatalagataṃ taṃ dantadhātum adisvā  
 nayanasaliladhāraṃ sokajātaṃ kirantā  
 sugatasutavaram taṃ taṅkhaṇe 'nussariṃsu
- 32 Atha sugatasuto so cintitaṃ samviditvā  
 agami savidham esaṃ sokadīnānanānaṃ  
 asuṇi ca jīnadhātum vālukārāsīmajjhe  
 nihitam api adiṭṭhaṃ pūjitaṃ jampatīhi
- 33 Sayitam atha yatī so dibbacakkhuppabhāvā  
 ratanagirinikuṇṇe nāgarājaṃ apassi  
 vihaḡapatisarīraṃ māpayī taṃ muhutte <sup>3</sup>  
 vitataputhulapakken' antaḷikkham thakentaṃ
- 34 Jaladhim atigambhīraṃ taṃ dvidhā so karitvā  
 pabalapavanavegen' attano pakkhajena  
 sarabhasam abhidhāvaṃ bhīmasaṃrambhayogā  
 abbigami bhujagindaṃ Merupāde nipannaṃ

<sup>1</sup> B. °bhuvana°.<sup>2</sup> B. °marīci-jālam.<sup>3</sup> B. taṃ muhutte.

- 35 Jahitabhujagaveso taṅkhaṇe<sup>1</sup> so phaṇindo  
 paṭibhayacakitatto saṅkhipitvāna bhoge  
 sarabhasam upagantvā tassa pāde namitvā  
 viṇayamadhuram itthaṃ taṃ munisaṃ avoca
- 36 Sakalajanahitatthaṃ eva jāyanti buddhā  
 bhavati janahitatthaṃ dhātumattassa pūjā  
 aham api jinadhātum pūjayitvā mahagghaṃ  
 kusalaphalam anappaṃ sañcinissan<sup>2</sup> ti gaṇhiṃ
- 37 Atha manujagaṇānaṃ saccabodhārāhaṇaṃ  
 vasatibhavanam esā nīyate Sīhaḷaṃ taṃ  
 munivaratanudhātum tena dehīti vutto  
 bhujagapati karaṇḍaṃ dhātugabbhaṃ adajji
- 38 Vihagapatitanuṃ taṃ saṃharitvāna thero  
 jalacarasatabhīmā aṇṇavā uppatitvā  
 sakalapāṭhavicakke rajjalakkhim va dhātum  
 narapatitanujānaṃ jampatīnaṃ adāsi
- 39 Iti katabahukāre saṃyaminde payāte  
 sugatadasanadhātum muddhanā ubbahantā  
 mahati vipinadevādihi magge payutte  
 vividhamahavidhāne te tato nikkhamiṃsu
- 40 Mudusurabhisamīro kaṇṭakādivyapeto  
 vimalapulinahārī āsi sabbattha maggo  
 ayanam upagate te dantadhātupubbhāvā  
 nigamanagaravāsī sādhu sammānayiṃsu
- 41 Kusumasurabhicuṇṇākīṇṇahattāhi niccaṃ  
 sakutukam anuyātā kānane devatāhi  
 acalagahanaduggaṃ<sup>3</sup> khepayitvāna maggaṃ  
 agamum aturitā te paṭṭanaṃ Tāmalittim
- 42 Acalapadarabaddhaṃ suṭṭhitodārakūpaṃ  
 uditaputhulakāraṃ dakkhaniyyāmakam ca  
 sayamabbhimata-Laṅkāgāminam nāvam ete  
 sapadi samuparūḷhaṃ addasum vāṇijehi
- 43 Atha dijaṇavarā te Sīhaḷaṃ gantum icchaṃ  
 sarabhasam upagantvā nāvikkassāvadhiṃsu  
 sutisukhavacasā so sādhu vuttena tesam<sup>4</sup>  
 pamuditahadayo te nāvam āropayittha

<sup>1</sup> B. (here and at 31 and 52) taṃ khaṇe. <sup>2</sup> M. sañcinissan. <sup>3</sup> B. M. °gahaṇa°.

<sup>4</sup> M. c' esam.

- 44 Jālanidhim abhirūḷhesv esu ādāya dhātum  
 samabbhavam upasantā lolakallolamālā  
 samasurabhimanuñño uttaro vāyi vāto  
 vimalarucirasobhā sabbathā 'sum disā pi
- 45 Nabhasi asitasobhe Venateyyo va nāvā  
 pabalapavanavegā santatam dhāvamānā  
 nayanavisayabhāvātītātīrācalādim  
 pavasi jaladhimajjham phenapupphābhikiṇṇam
- 46 Atha abhavi samuddo bhīmasamvattavātā-  
 'bhīhatasikharikūṭākāravācippabandho  
 savaṇabhiduraghorārāvaruddhantaḷikkho  
 bhayacakitamanussakkandito sabbarattim
- 47 Udayasikharisīsam nūtanādieccabimbe  
 upagatavati tassā rattiya accayamhi  
 salīlanidhijalam tam santakallolamālam  
 asitamāṇiviccittam koṭṭimam vāvabhāsi
- 48 Atha vitataphaṇālibhimsanā keci nāgā  
 surabhikusumahatthā keci dibbattabhāvā  
 ruciramaṇipadīpe keci sandhārāyantā  
 nijasirasi karontā keci kaṇḍuppalāni
- 49 Phuṭakumudakalāpe jattun' eke vahantā  
 kanakakalasamālā ukkhipantā ca keci  
 pavanacalitaketuggāhakā keci eke  
 rucirakanakacunṇāpunṇacaṅgoṭahatthā
- 50 Salalitaramaṇīyam<sup>1</sup> keci naccam karontā  
 salayamadhuragītam gāyamānā 'va keci  
 pacuraturiyabhaṇḍe āhanantā ca<sup>2</sup> eke  
 munivaratanudhātum pūjitum utṭhahimsu
- 51 Rucirakacakalāpā rājakaṇṇāya tassā  
 munivaradasanam tam ambaram uppatitvā  
 asitajaladagabbhā niggate vindulekhā  
 ujurajatasalākāsannibhe muñci raṃsī
- 52 Atulitam anubhāvam dhātuyā pekkhatam tam  
 pamuditahadayānam taṅkhaṇe pannagānam  
 paṭiravabharitānam sādhuṇvādādikānam  
 gaganam apariyantam v'āsi vitthāritānam

<sup>1</sup> B. °laḷita°.<sup>2</sup> M. va.

- 53 Pavisi sugatadāṭhādhātu sā moligabbhaṃ <sup>1</sup>  
 puṇa gaganatalamhā otaritvāna tassā  
 phaṇadharanivahā te taṃ taṃ vārayitvā  
 maham akarum udāraṃ sattarattindivamhi
- 54 Acalam iva vimānaṃ antaḷikkhamhi nāvaṃ  
 gativirahitam ambhorāsimajjhamhi disvā  
 bhayavilulitacittā jampatī te samaggā  
 dasabalatanujaṃ taṃ iddhimantaṃ sarīṃsu
- 55 Sapadi munisuto so cittaṃ esaṃ viditvā  
 nabhasi jaladharālī maddamāno 'bhigantvā  
 vihagapatisarīraṃ māpayitvā mahantaṃ  
 bhayacakitabhujāṅge te palāpesi <sup>2</sup> khippaṃ
- 56 Itthaṃ buddhasute bhujāṅgajanitaṃ bhūtiṃ sametvā gate  
 sā nāvā pavanā pakampitadhajā tuṅgaṃ taraṅgāvaliṃ  
 bhindanti gativegasā puthutaraṃ meghāvalisannibhaṃ  
 Lankāpaṭṭanam otarittha sahasā therassa tass' iddhiyā

CATUTTHO PARICCHEDO.

<sup>1</sup> B. moli°.

<sup>2</sup> M. palāpesi.

## PAÑCAMO PARICCHEDO.

- 1 Samvaccharamhi navamamhi Mahādisena-  
puttassa Kittisirimegha-narādhhipassa  
te jampatī tam atha paṭṭanam otaritvā  
devālaye paṭivasim̐su manobhirāme
- 2 Disvāna te dvijavaro pathike nisāyaṃ  
santappayittha madhurāsanapānakehi  
rattikkhaye ca Anurādhapurassa maggāṃ  
jāyāpatinam atha so abhivedayittha
- 3 Ādāya te dasanadhātuvaram Jinassa  
sammānitā dvijavaren' atha paṭṭanamhā  
nikkhamma dūratarāmaggaṃ atikkamitvā  
padvāragāmaṃ Anurādhapurassa gañchumaṃ
- 4 Yaṃ dhammikaṃ naravaraṃ abhitakkayitvā  
jāyāpatī visayaṃ etaṃ upāgaṃim̐su  
taṃ vyādhinā samuditena Mahādisena-  
Lankissaraṃ sucirakālakataṃ suṇim̐su
- 5 Sokena te sikharineva samuggatena  
ajjhotthaṭṭā bahutaraṃ vilapiṃsu mūlha  
khāyim̐su tesam atha mucchitamānasānaṃ  
sabbā disā ca vidisā ca ghanandhakārā
- 6 Sutvāna Kittisirimegha-narādhhipassa  
rajjē ṭhitassa ratanattayamāmakattaṃ  
vassena nibbutamahādahanā va kacchā  
te jampatī samabhavaṃ hatasokatāpā
- 7 Sutvāna Meghagiri-nāma mahāvihāre  
bhikkhussa kassaci narādhhipavallabhattaṃ  
tass' antikaṃ samupagamma katātithēyyā  
dhātappavattim̐ avadiṃsu ubho samecca
- 8 Sutvāna so munivaro dasanappavattim̐  
haṭṭho yathāmatarasēn' abhisittagatto  
gehe sake sapadi paṭṭavitānakehi  
vaḍḍhesi dhātum amalaṃ samalaṅkatamhi

- 9 Tesam ca jānipatikānam ubhinnaṃ eso  
katvāna saṅghaṃ uḷārataṃ yathicchaṃ  
vuttantaṃ etaṃ abhivedayitum pasatthaṃ  
Laṅkādhīpassa savidhaṃ paṇiṭṭha bhikkhum
- 10 Rājā vasantasamaye sahaakāminīhi  
uyyānakelisukhaṃ ekadine 'nubhonto  
āgacchamānaṃ atha tattha sudūrato va  
taṃ vipasannaṃ mukhavaṇṇaṃ apassi bhikkhum
- 11 So saṇḍamāṇo samupagamma nārādhipaṃ taṃ  
vuttantaṃ etaṃ abhivedayi tuṭṭhacitto  
sutvāna taṃ paramapītibharaṃ vahaṇto  
sappattacakkaratano va ahoṣi rājā
- 12 Laṅkissaro dvijavarā jīnadantadhātum  
ādāya jānipatayo ubhaya<sup>1</sup> samecca  
essanti Laṅkaṃ acireṇa itiritaṃ taṃ  
nemittikassa vacanaṃ ca tathaṃ amāññi
- 13 Rājā tato mahatīyā parisāya saddhiṃ  
tassānurādhanagarassa puruttārāya  
āsāya taṃ sapadī Meghagiriṃ vihāraṃ  
saddho agaṇṇhi padasā va pasannacitto
- 14 Disvā tato sugatadhātum alabbhaneyyaṃ  
ānandajassunivāhehi ca tārahāraṃ  
siṅgaṃ vidhāya paṇidhiṃ bahumānapubbam  
romaṇcakaṇcukadharo iti cintayittha
- 15 So 'haṃ anekaratanujjalamolīdhāriṃ  
pūjeyyaṃ ajja yadi duccejaṃ uttamaṅgaṃ  
lokattayekasaraṇassa Tathāgatassa  
no dhātuyā maham anucchavikaṃ kareyyaṃ
- 16 Etaṃ pahūtaratanaṃ sadhanaṃ sabhoggaṃ  
sappūjayaṃ api dharāvalayaṃ asesam  
pūjaṃ karomi tadanucchavikaṃ ahaṃ ti  
cinteyya ko hi bhuvanesu amūḷhacitto
- 17 Laṅkādhīpaccam idam appataraṃ mam' āsi  
buddho guṇehi vividhehi pamāṇasaṇṇo  
so 'haṃ parittavibhavo tibhavekanāthaṃ  
taṃ tādīsaṃ dasabalaṃ kathaṃ accayissaṃ

---

<sup>1</sup> B. ubhaya.

- 18 Ittham punappuna tad eva vicintayanto  
 āpajji so dhitiyuto pi visaññibhāvaṃ  
 saṃvījito sapadi cāmaramārutena  
 khinnena sevakajanena alatta saññaṃ
- 19 Thokam pi bījam athavā abhiropayantā  
 medhāvino mahatiyā pi vasundharāya  
 kālena pattatacapupphaphalādikāni  
 vindanti patthitaphalāni anappakāni
- 20 Evaṃ guṇehi vividhehi pi appameyye  
 dhammissaramhi maham appataram pi katvā  
 kālaccayena pariṇāmaṃvisesarammaṃ  
 saṃgāpavaggasukham appaṭimaṃ labhissam
- 21 Ittham vicintiya pamodabharātireka-  
 sampuṇṇacandimasarikkhamukho narindo  
 sabbañño dasanadhātuvarassa tassa  
 pūjesi sabbam api Sihaḷadīpaṃ etaṃ
- 22 Bhikkhū pi tepitakajātakabhāṇakādī<sup>1</sup>  
 takkāgamādikusalā api buddhimanto  
 vatthuttayekasaraṇā api poravaggā  
 kotūhalā sapadi sannipatiṃsu tattha
- 23 Rājā tato mahatiyā parisāya majjhe  
 icc abravī<sup>2</sup> munivaro hi susukkadāṭho  
 dāṭhā jinassa yadi osadhitārakā va  
 setā bhaveyya kim ayaṃ malinā 'vabhāsā
- 24 Tasmaṃ khaṇe dasanadhātu munissarassa  
 pakkhe pasāriya duve viya rājahaṃsī  
 vitthāritamaṃsunivahā gaganāṅganamhi  
 āvaṭṭato javi javena muhuttamattaṃ
- 25 Paccaggham attharaṇakaṃ sitam attharivā  
 bhaddāsanamhi vinidhāya munindadhātum  
 taṃ jātipupphanikarena thakesi rājā  
 vassaccayambudharakūṭasamappabhena
- 26 Uggamma khippam atha dhātu munissarassa  
 sā puppharāsīsikhamamhi patitṭhahitvā  
 ramaṃsihi duddhadhavahehi virocamaṇā  
 sampassataṃ animise nayane akāsi

<sup>1</sup> B. °bhāpakādī.<sup>2</sup> M. abruvī.

- 27 Tam dhātum āsanagatatamhi patitṭhapetvā  
khīrodapheṇapaṭalappaṭime dukūle  
chādesi sātakasatehi mahārahehi  
bhiyyo pi so upaparikkhitukāmatāya
- 28 Abbhuggatā sapadi vatthasatāni bhetvā  
setambudodaraviniggatacandimā va  
ṭhatvāna sā upari tesam abhāsayittha  
raṃsihi kundavisadehi disā samantā
- 29 Tasmim khape vasumatī saha bhūdharehi  
gajjittha sādhuvacanaṃ va samuggirantī  
taṃ abbhutaṃ viya samekkhitum amburāsi  
so niccalo abhavi santataramgabāhu
- 30 Mattebhakampitasupupphitasālato va  
bhassimsu dibbakusumāni pi antaḷikkhā  
nacesu cāturiyam acchariyaṃ janassa  
sandassayimsu gagane surasundarī pi
- 31 Ānandasañjanitatāravābhirāmam  
gāyimsu gītam amatāsanagāyakā pi  
muñciṃsu dibbaturiyāni pi vāditāni  
gambhīram uccamadhuraṃ diguṇaṃ ninādaṃ
- 32 Saṃsibbitaṃ rajatarajjusatānukārī-<sup>1</sup>  
dhārāsatehi vasudhambaram ambudena  
sabbā disā jaladakūṭamahagghiyesu  
dittācirajjutipadīpasatāvabhāsā
- 33 Ādhūyamāna-Malayācalakānananto  
samphullapupphajaparāgabharābhihāri  
sedodabindugaṇasaṃharaṇappaviṇo  
mandaṃ avāyi sisiro api gandhavāho
- 34 Rājā taṃ abbhutaṃ avekkhiya pāṭihīraṃ  
lokussavaṃ bahutaraṃ ca aditṭhapubbaṃ  
vipphāritakkiyugalo paramappamodā  
pūjaṃ karittha mahatiṃ ratanādikehi
- 35 So dhātum attasirasā 'tha samubbahanto  
ṭhatvā samussitasitātapavāraṇamhi  
cittatthare rathavare sitavājiyutte  
lakkhinidhānam Anurādhapuram pavekkhi

- 36 Devindamandirasame samalaṅkatamhi  
 rājā sakamhi bhavane atulānubhāvo  
 sīhāsane paṭikakojavasanthatamhi  
 dhātum t̐apesi munino sasitātapatte
- 37 Anto va bhūmipati dhātugharam mahaggham  
 katvāna tattha vinidhāya munindadhātum  
 sampūjayittha vividhehi upāyanehi  
 rattindivam tidivamokkhasukhābhikaṅkhī
- 38 Tesam ca jānipatikānam ubhinna eva  
 tuṭṭho bahūni ratanābharaṇādikāni  
 gāme ca issarakulekanivāsabhūte  
 datvāna saṅgaham akāsi ti-Sihaḷindo
- 39 Saṅgama jānapadanegamanāgarādi  
 ukkaṇṭhitā sugatadhātum apassamānā  
 lokuttamassa caritāni abhithavantā  
 ugghosayimsu dharanipatisannidhāne
- 40 Dhammissaro nikhilalokahitāya <sup>1</sup> loke  
 jāyittha sabbajanatāhitam ācarittha  
 vitthāritā bahujaṇassa hitāya dhātū  
 icchāma dhātum abhipūjayitum mayam pi <sup>2</sup>
- 41 So sannipātiya mahipati bhikkhusaṅgham  
 āramavāsim Anurādhapuropakaṇṭhe  
 ajjhāsayaṃ tam abhivedayi satthudhātu-  
 pūjāya sannipatitassa mahājanassa
- 42 Thero tahiṃ mahati bhikkhugaṇe pan'eko  
 medhābalena asamo karuṇādhivāso  
 evaṃ ti-Sihaḷapatissa mahāmatissa  
 lokatthacāraturassa nivedayittha
- 43 Yo ācareyya anujīvanassa atthaṃ  
 eso have 'nucarito mahataṃ sabhāvo  
 dhātum vasantasamaye bahi nīharitvā  
 dassehi puññaṃ abhipatthayataṃ janānaṃ
- 44 Sutvāna saṃyamivarassa subhāsītāni  
 pucchittha so naravaro puna bhikkhusaṅgham  
 dhātum namassitum anena mahājanena  
 t̐hānaṃ kim ettha <sup>3</sup> ramaṇiyataraṃ siyā ti

<sup>1</sup> M. sakala for nikhila.<sup>2</sup> B. mayan ti.<sup>3</sup> B. attha.

- 45 Sabbe pi te atha nikāyanivāsibhikkhū  
 ṭhānaṃ sakaṃ sakam avaṇṇayum ādarena  
 aññoññabbhinnavacanesu ca tesu rāja  
 nevābbhinandi na paṭikkhipi kiñci vākyam
- 46 Majjhataṭṭānugatamānasatāya kintu  
 rājā avoca puna bhikkhugaṇassa majjhe  
 attānurūpam ayam eva munindadhātu  
 ṭhānaṃ khaṇena sayam eva gamissatīti
- 47 Rājā tato bhavanam eva sakaṃ upecca  
 dhātuppaṇāmam abhipatthayataṃ janānaṃ  
 khippaṃ mukhambujavanāni vikāsayanto  
 sajjetum āha nagaraṃ ca vihāramaggaṃ
- 48 Sammajjitā salilasecanasantadhūli  
 racchā tadā 'si pulinattharaṇābhiraṃmā  
 ussāpitāni kanakādivicittitāni  
 vyagghādirūpakhacitāni ca toraṇāni
- 49 Chāyānivāritavirocanaraṃsitāpā  
 naccaṃ va dassayati vātadhutā dhajālī  
 vīthī vasantavanarājisaṃnavaṇṇā  
 jātā sujātakadalītarumālīkāhi
- 50 Saṃsūcayanti ca satam navapuṇṇakumbhā  
 saggāpavaggasukham icchitam ijjhatīti  
 kappūrasāratagarāgarusambhavehi  
 dhūpehi duddinam atho sudinaṃ ahosi
- 51 Olambamānasitamuttikajālakāni  
 sajjāpitāni vividhāni ca maṇḍapāni  
 sampādītāni ca taḥiṃ kusumagghikāni  
 āmodaluddhamadhupāvalikūjitāni
- 52 Gacchimsu keci gahitussavavesasobhā  
 eke samuggaparipūritapupphahatthā  
 aññe janā surabhiṇṇabharaṃ vahantā  
 tatthetare dhatavicittamahātapattā
- 53 Laṅkissaro 'tha sasipaṇḍaravājjiyutte  
 ujjotite rathavare ratanappabhāhi  
 dhātum tilokatilakassa paṭiṭṭhapetvā  
 etaṃ avoca vacanaṃ paṇipātapubbaṃ
- 54 Sambodhiyā iva munissara bodhimandaṃ  
 gaṇḍambarukkhā iva titthiyamaddanāya

- dhammañ ca saṃvibhajitum Migadāyam ajja  
 pūjānurūpam upagaccha sayam padesaṃ  
 55 Rājā tato samucitācaraṇesu dakkho  
 vissajji phussaratham aṭṭhitasārathim taṃ  
 pacchā sayam mahatiyā parisāya saddhim  
 pūjāvisesaṃ asaṃ agamā karonto  
 56 Ukkuṭṭhināḍavisarena mahājanassa  
 hesāravena viṣaṇena turaṅgamānaṃ  
 bherīravena mahatā karigajjitena  
 uddāmasāgarasamaṃ nagaraṃ ahosi  
 57 Āmoditā ubhayavīthigatā kulitthī  
 vātāyanehi kanakābhatāṇe khipiṃsu  
 sabbatthakaṃ kusumavassam avassayiṃsu  
 celāni c'eva bhamayiṃsu nijuttamaṅge  
 58 Pācīnagopurasamīpam upāgatamhi  
 tasmim rathe jaladhipiṭṭhigate 'va pote  
 tuṭṭhā taḥim yatigaṇā manuḍā ca sabbe  
 sampūjayiṃsu vividhehi upāyanehi  
 59 Katvā padakkhiṇaṃ atho puram uttarena  
 dvārena so rathavaro bahi nikkhamitvā  
 ṭhāne Mahindamunidhammakathāpavitte  
 aṭṭhāsi tiṭthagamitā iva bhaṇḍanāvā  
 60 Ṭhāne taḥim dasanadhātuvaṃ jinaṣṣa  
 Laṅkissaro ratanacittā karaṇḍagabbhā  
 saṅghāghaṇā iva vidhūṃ bahi nīharitvā  
 dassesi jānapadanegamaṇāgarānaṃ  
 61 Tasmim jane sapadī ābharaṇādivassam  
 accantapītibharite abhivassayante  
 sānandavandijanaṃaṅgalagītakehi  
 sampāditesu mukhaṇesu disā mukhesu  
 62 Hatthāravindanivahesu mahājanassa  
 candodaye 'va mukulattanam āgatesu  
 brahmāmarādijanitāmitasādhuvāde  
 tārāpathamhi bhuvanodaram ottharante  
 63 Sā dantadhātu sasikhaṇḍasamānavañṇā  
 raṃsīhi kundana vacandanapaṇḍarehi  
 pāsādagopurasiluccayapādapādim <sup>1</sup>

---

<sup>1</sup> B. °pādi.

- niddhotarūpiyamayaṃ va akā khaṇena  
 64 Tappāṭihāriyaṃ <sup>1</sup> acintiyam acculāraṃ  
 disvāna ke tahiṃ ahesuṃ ahaṭṭhalomā  
 ke vā nayuṃ sakasakābharaṇāni gehaṃ  
 ke vā na attapaṭilābham avaṇṇayaṃsu  
 65 Ke no jahimsu sakadiṭṭhimalānubaddhaṃ  
 ke vā na buddhamahimaṃ abhipatthayaṃsu  
 ke nāma macchariyapāsavasā ahesuṃ  
 vatthuttayaṃ ca saraṇaṃ na gamiṃsu ke vā  
 66 Laṅkissaro pi navalakkhapaṛibbayena  
 sabbaññudhātum atulaṃ abhipūjayitvā  
 taṃ dantadhātubhavanaṃ puna vaḍḍhayitvā  
 antopuramhi <sup>2</sup> paṭivāsaram accayittha  
 67 Dhātuṃ vihāram Abhayuttaram eva netvā  
 pūjaṃ vidhātum anuvaccharam evarūpaṃ  
 rājā 'tha Kittisirimeghasamavhaya so  
 cārittalekhaṃ abhilekhaṃ saccasandho  
 68 Cārittaṃ etaṃ itare pi pavattayantā  
 te Buddhadāsapamukhā vasudhādhināthā  
 saddhādayādhikaguṇābharaṇābhiraṃ  
 taṃ sakkariṃsu bahudhā jīnadantadhātuṃ  
 69 Satthārā sambhatatthaṃ purimatarabhava sampajānaṃ  
 pajānaṃ  
 sambodhiṃ tassa sabbāsavavigamaṃ karimāṃ saddahant'  
 odahanto  
 soṭaṃ tass' aggaḍhamme nipunamati sātaṃ saṅgame  
 saṅgaṃ esaṃ  
 nibbāṇaṃ santaṃ icche tibhavabhayaṃ pariccāgaheṭuṃ  
 gaheṭuṃ

PAÑCAMO PARICCHEDO.

DĀṬHAVAMSA SAMATTO.

<sup>1</sup> M. Taṃ pāṭihāriyaṃ.

<sup>2</sup> M. antepuramhi.

## KATTUSANDASSANAGĀTHA.

- 1 Yo Candagomiracite varasaddasatthe  
 ñikam pasattham akarittha ca Pañcikāya  
 buddhippabhāvajananiñ ca akā Samanta-  
 pāsādikāya vinayaññhakathāya ñikam
- 2 Añguttarāgamavaratññhakathāya ñikam  
 sammohavibbhamavighātakarim akāsi  
 atthāya samyamigañassa padhānikassa  
 gantham akā Vinayaññgaha-nāmadheyyam
- 3 Santindriyassa pañipattiparāyañassa  
 sallekhavuttiniratassa samāhitassa  
 appicchatādiguñayogavibhūsanassa  
 sambuddhasāsanamahodayakārañassa
- 4 Sabbesu ācariyatam paramaññgatassa  
 satthesu sabbasamayantarakovidassa  
 sissena Sāritanujassa mahādisāmi-  
 pādassa tassa vimalanvayasambhavassa
- 5 Suddhanvayena karuñādiguñodayena  
 takkāgamādikusalena visāradena  
 sabbattha patthasudhākararamsijāla-  
 sañkāsakittivisarena parikkhakena
- 6 Saddhāadhanena sakhilena ca Dhammakitti-  
 nāmena rājagurunācariyena eso  
 sotuppasādajanano Jinadantadhātu-  
 vam-so kato nikhiladassipabhāvadīpo
- 7 Dhammo pavattatu cirāya munissarassa  
 dhamme ñhitā vasumatīpatayo bhavantu  
 kāle pavassatu ghano nikhilā pajā pi  
 aññaññamettipañilābhasukham labhantu

THE END.